

Kingusinnerpaamik UKA2016-imut atatillugu Kalaallit Nunaanni Inatsisartunut qinersisarneq pillugu inatsit nr. 9, 31. oktober 1996-imeersumut, kiisalu Kommunalbestyrelsinut, Nunaqarfinni Aqutsisunut Ilagiillu Sinniisaannut qinersisarnerit pillugit inatsit nr. 7, 3. december 2012-meersoq pillugu Inatsisartut inatsisaannut allannguutissanik saqqummiussinissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni tamakkiisumik Inatsisartunut aammalu kommunalbestyrelsinut, Nunaqarfinni Aqutsisunut Ilagiillu Sinniisaannut qinersisinnaanermut tamakkiisumik qinersisinnaanermut ukiorisat ullumikkut 18-iusut 16-inngortillugit.
(Inuit Ataqtigiit Inatsisartuni gruppianni ilaasortat)

Siullermeerneqarnera

Akissuteqaat

(Naalakkersuisut Siulittaasuat)

Aallarniutigalugu siunnersuummut Naalakkersuisut qujaniarput. Soorlu siunnersuuteqartunit erseqqissarneqartoq ilaatigut Inatsisartunut kommunalbestyrelsinullu qinersinerni taasiartortut amerlanerusarnissaat kissaatiginaraluarpoq. Assersuutigalugu siunnersuummi takuneqarsinnaavoq 2014-imi Inatsisartunut qinersisoqarnerani taasiartortut procentinngorlugit 72,9 %-iupput, 2013-imilu kommunalbestyrelsinut qinersisoqarnerani 58,3 %-ullutik.

Naalakkersuisullu nassuerutigilluinnarpaat inuusuttoqarmat 18-it inorlugit ukiulinnik inerereersimasunik akisussaassuseqartunillu, naalakkersuinermillu suliaqassallutik tunuarsimaanngitsunik. Inuusuttut tamakku taasisinnaatitaanermut ukioritinneqartut 18-iunerat pissutigalugu ullumikkut taasinissaminnut periarfissaqanngillat.

Imminullu oqartussaaffigilernissamut ukioritinneqartut 18-iupput, tamatumalu kinguneralugu inuusuttup 18-iliinissaa tikillugu angajoqqaat oqartussaassuseqartussaasut, aatsaallu 18-iliinermi inuttut nammineersinnaalersutut isigineqalertussaalluni, tamannalu aqutugalugu inersimasut allat assigalugit inatsisitigut pisussaaffeqalertussaalluni.

Taasisinnaatitaanermut imminullu oqartussaaffigilernissamut ukioritinneqartut ataqtigiissillugit aalajangiusimaannarnissaat Naalakkersuisunut pingaaruteqartorujussuovoq, tassungalu ilaavoq qinersisartuuneq aamma qinigassanngortissinnaanermut ilaammat, taamaalillunilu assersuutigalugu Inatsisartunut qinerneqarsinnaaneq periarfissaalluni. Taamaammat qinersisartut ilaatigooriarlutik ikippallaartarnerannut 16-inik ukiullit taasisinnaatitaalernissaat aqqissutissaanngilaq.

Tamannalu tunngavigalugu siunnersuut Naalakkersuisut tapersorsinnaanngilaat.